

# Gŵyl y Castell

14 Medi 2024



Mae'n Aber ŵyl. Mae'n hen bryd!  
Dethlwch, a chwifiwch hefyd  
Rif y sêr o faneri,  
Rhennwch a hyrwyddwch hi,  
Dewch o bell i gastell gŵyl  
Ar derfynau'r dref annwyl.

Mae 'na ŵyl man na welwyd  
Affliw o ddim lliw ond llwyd;  
Chwalwn y garsiwn a'r gard,  
A dadwneud cadwyn Edward,  
Trown gastell y fwyell fain  
Law yn llaw'n gastell Owain.

At ŵyl i bawb o'r teulu  
Heidio mae talentau lu,  
Drwy'r dre, ni chei fargen fwy  
Na'r Sadwrn amhrisiadwy;  
Am gîg, ni chei gynnig gwell:  
Nid yw'n costio'n y castell!

Dere i'r ŵyl, nid ar alwad  
Didostur i gyrchu'r gad,  
Ond ar alwad curiad cân  
Arwyr llafar y llwyfan,  
Hedleinyrs mae'u dylanwad  
I'w glywed ledled y wlad.

Be well i gastell na gîg?  
Gwell yw castell acwstig  
Nag un distaw gwrandaugar  
Ei gell a'i borth, a gwell bar  
O gwrw da nag o'r dur  
I dref heb brinder yfwyr!

I'r dre, dere heb darian  
Galed hyll na fflaglau tân;  
Y gatrawd, gad hi gytre,  
Haid rydd sy'n galw'n y dre  
Yn Gymraeg yma am rador,  
Am 'fwy, mwy, mwy!' uwchlaw'r môr.

Yn nawns y don nos a dydd,  
Clyw dôn caneuon newydd;  
Daw i'r unlle'n daranllyd  
Y bandiau gorau i gyd;  
Glyw di'r gân? Sigla drwy'r gîg.  
Mae'n hiaith yma'n anthemig.

I gîg yng Ngheredigion,  
Rhwnng Teifi, Dyfi a'r don,  
Dewch i gyd, newidiwch gêr,  
Dewch, bawb, dewch heibio i Aber  
Yn dorf fwyn i'r dref annwyl,  
Dewch o bell i gastell gŵyl.

*Eurig Salisbury*

